

ՀՀ ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 28/5

14 հուլիսի 2015 թ.

Քննարկվեց Ա/Ձ Արա Ստեփանյանի 19.06.2015 թ-ի դիմումով բերված միջնորդությունը 2015 թ-ին շրջանառության հարկ վճարող համարվելու վերաբերյալ:

Ա/Ձ Արա Ստեփանյանի բերված փաստարկները.

Ա/Ձ Արա Ստեփանյանը հայտնում է, որ 2014 թ-ի օրացուցային տարում աշխատել է շրջանառության հարկով և իր առևտրային գործունեության իրացման շրջանառությունը չի գերազանցել այն շեմը, որ համարվի ԱԱՀ վճարող:

ՀՀ ՖՆ Արաբկիրի ՀՏ կողմից Ա/Ձ Արա Ստեփանյանին ծանուցվել է, որպեսզի վերջինիս կոմից ներկայացվի 2015 թ-ին շրջանառության հարկ վճարող համարվելու վերաբերյալ հայտարարություն: Քանի որ Ա/Ձ Արա Ստեփանյանը հաշվառման է կանգնած Վ.Հասրաթյան 6 շենք, բն. 16Ա հասցեում, սակայն բնակվում է Եր.Քոչարի 13 շենք, բն. 119 հասցեում և առևտրային գործունեությունն իրականացնում է Նար-Դոսի փողոցի 113/2 հասցեում, հետևապես իրեն հասցեագրված վերոգրյալ պատվիրված նամակը «Հայփոստ» ՓԲԸ Երևան 31 փոստային բաժանմունքում ստացվել է 24.01.2015 թ-ին և նույն օրը փոստատարի կողմից հանձնվել է Ռ.Մելիքյան 67 հասցեում բնակվող այլ անձի՝ իր նախկին հարևանին, որն էլ մոռացել է իրեն հանձնել և տեղյակ պահել այդ մասին: Արդյունքում Ա/Ձ Արա Ստեփանյանն անտեղյակ է եղել և չի ծանուցվել շրջանառության հարկ վճարող համարվելու վերաբերյալ հայտարարություն ներկայացնելու վերաբերյալ, որի հետևանքով էլ ՀՀ ՖՆ Արաբկիրի ՀՏ կողմից Ա/Ձ Արա Ստեփանյանը դիտվել է որպես ԱԱՀ վճարող:

Ա/Ձ Արա Ստեփանյանը հայտնում է նաև, որ իր առևտրային գործունեության իրացման ծավալները շատ փոքր են, հետևապես նա չի կարող աշխատել ԱԱՀ-ի դաշտում:

Ելնելով վերոգրյալից՝ Ա/Ձ Արա Ստեփանյանը խնդրում է աջակցել և թույլատրել աշխատել օրենքով սահմանված շրջանառության հարկի դաշտում:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ Արաբկիրի ՀՏ կողմից Ա/Ձ Արա Ստեփանյանին փաստային ծառայության միջոցով ծանուցվել է շրջանառության հարկ վճարող համարվելու վերաբերյալ հայտարարություն ներկայացնելու վերջնաժամկետ սահմանված լինելու մասին: Սակայն հաշվի առնելով այն հանգամանքը, որ Ա/Ձ Արա Ստեփանյանի հաշվառման, բնակության և փաստացի գործունեության հասցեները տարբեր են, հետևապես վերոգրյալ ծանուցումը իր կողմից չի ստացվել: Արդյունքում Ա/Ձ Արա Ստեփանյանի կողմից չի ներկայացվել շրջանառության հարկ վճարող համարվելու վերաբերյալ հայտարարություն, ինչը և հիմք է հանդիսացել ՀՀ ՖՆ

Արաբկիրի ՀՏ կողմից Ա/Ձ Արա Ստեփանյանին որպես ԱԱՀ վճարող համարելու համար:

Վերոգրյալի կապակցությամբ հարկ է նշել, որ «Շրջանառության հարկի մասին» ՀՀ օրենքում փոփոխություններ և լրացումներ կատարելու մասին ՀՀ 21.06.2014 թ-ի թիվ ՀՕ-128-Ն օրենքի 10-րդ հոդվածի 2-րդ մասի համաձայն. «Սույն օրենքի 1-ին հոդվածի 1-ին կետի «գ» ենթակետով Օրենքի 4-րդ հոդվածի 1-ին մասում լրացվող 1-ին կետով նախատեսված՝ վերադաս հարկային մարմնի ղեկավարի հաստատած ձևով շրջանառության հարկ վճարող համարվելու վերաբերյալ հայտարարություն ներկայացնելու վերջնաժամկետը կիրառվում է միայն այն դեպքում, եթե հարկային մարմինը հարկ վճարողին ծանուցել է սույն օրենքով նման վերջնաժամկետ սահմանված լինելու մասին: Եթե հարկային մարմինը սույն մասով նախատեսված ծանուցումը հարկ վճարողին ուղարկում է սույն օրենքի 1-ին հոդվածի 1-ին կետի «գ» ենթակետով սահմանված ժամկետներից հետո, պառ որպես շրջանառության հարկ վճարող համարվելու վերաբերյալ հայտարարության ներկայացման վերջնաժամկետ սահմանվում է հարկ վճարողին ծանուցումը տրամադրելու օրվան հաջորդող 7-րդ աշխատանքային օրը»:

Քննարկվող դեպքում ՀՀ ՖՆ Արաբկիրի ՀՏ կողմից Ա/Ձ Արա Ստեփանյանին ծանուցվել է վերադաս հարկային մարմնի ղեկավարի հաստատած ձևով շրջանառության հարկ վճարող համարվելու վերաբերյալ հայտարարություն ներկայացնելու վերջնաժամկետ սահմանված լինելու մասին: Սակայն վերը նշված հանգամանքների բերումով Ա/Ձ Արա Ստեփանյանը չի ստացել ծանուցումը, որի հետևանքով գրկվել է շրջանառության հարկ վճարող համարվելու վերաբերյալ հայտարարություն ներկայացնելու ՀՀ օրենսդրությամբ իրեն վերապահված իրավունքից: Այսինքն, նշված հայտարարությունը, ըստ էության, Ա/Ձ Արա Ստեփանյանի կողմից չի ներկայացվել իրենից անկախ հանգամանքների բերումով, կամ կարելի է փաստել, որ կատարվածում, ըստ էության, բացակայում է Ա/Ձ Արա Ստեփանյանի մեղքը:

Ելնելով վերոգրյալից՝ Հանձնաժողովը գտնում է, որ Ա/Ձ Արա Ստեփանյանին անհրաժեշտ է հնարավորություն ընձեռել ներկայացնելու շրջանառության հարկ վճարող համարվելու վերաբերյալ հայտարարություն՝ 2015 թ-ին շրջանառության հարկ վճարող համարվելու համար:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Չ Ո Ս Է՝

Ա/Ձ Արա Ստեփանյանի 19.06.2015 թ-ի դիմումով բերված միջնորդությունը 2015 թ-ին շրջանառության հարկ վճարող համարվելու վերաբերյալ ընդունել:

Հանձնաժողովի նախագահ՝



Վ.Մ.ԻՐՈՒՄՅԱՆ